

Ernst Burren Nume no vor em Färnseh

Mundartgeschichten
Cosmos Verlag



Ernst Burren

Nume no vor em Färnseh

Mundartgeschichten

Cosmos Verlag

Die Herausgabe dieses Buches wurde unterstützt durch einen Beitrag aus dem Swisslos-Fonds des Kantons Solothurn.

Das Zitat von Manfred Papst auf dem Schutzumschlag ist aus seiner Rede an den Solothurner Literaturtagen 2015.

Alle Rechte vorbehalten

© 2022 by Cosmos Verlag AG, Muri bei Bern

Lektorat: Roland Schärer

Umschlag: Stephan Bundi, Boll

Satz und Druck: Merkur Druck AG, Langenthal

Einband: Schumacher AG, Schmitten

ISBN 978-3-305-00443-0

eISBN 978-3-305-00444-7

Das Bundesamt für Kultur unterstützt den Cosmos Verlag mit einem Förderbeitrag für die Jahre 2021–2024

www.cosmosverlag.ch

Inhalt

kei fisch gfange
dr esu vo kairo
d superchue bavona
d chüe vo 2020
bätte
angscht vor hüng
dr tröi timmi
eine wo düregseht
dr joshua wong
was die arichte
bim händichoufe
nid abunge si
s lili
s mimi
si wäg go
verknallt z thailand
träne z curitiba
die belüchteti chüuche
deheim
s blaue jäggli
heilendi häng
glück und unglück
plötzlich liggsch am bode
dr chrampf im see usse
problem
schwirigi familie

carne di coniglio
lehre kenne
d sonja vom bäre
inegheit
s herrgöttli
dr alois und dr enrico
so ne mönsch
i dr hüttige zit
dr füzgisch Geburtstag
dr fürsorglich erwin
d ottilia
bätte für d fuchs
schträng katholisch 1954
üse sohn shtudiert
dr letscht lehrer
juchhei blümelein
maha kumbh mela
säubschtgschpräch
im beschte auter
i bi iglade
e böse im lift
erledige
dr demänt hung
d mueter
d chrüzfahrt
bahn drü
e glückliche unfau
corona
s pia und d impfig

format
morn furt
sächzgi
en aute vatter
schöni ouge mit 76
akzie
üsi erschparnis
d amsle
dr letscht abschnitt
usbeinle
klassezämekunft
uf em fridhof
was wartet uf eim
dr tod gits nid
im nöchschte läbe
e troscht

kei fisch gfange

d isabell kenni scho öppe vierzg johr
mir göi immer wider zäme i d schtadt
und trinke zäme es gaffee

jetze isch si z amerika gsi
und schribt mir e schöni charte
mit em hemingway sim gsicht druffe

im seminar hei mir dä gross dichter
gärn gläse und si unheimlich truurig gsi
wo mir hei verno är heigi sich verschosse

d erzählig «Der alte Mann und das Meer»
fot mit em satz a
«Er war ein alter Mann, der allein in einem
kleinen Boot im Golfstrom fischte, und er war
jetzt vierundachtzig Tage hintereinander
hinausgefahren, ohne einen Fisch zu fangen.»

wies haut eso geit im läbe
mängisch hani jo ou s gfüeu
i heigi trotzdem dass i vüu gschaffet ha
nüt erreicht wie dä aut ma bim hemingway
wo kei fisch het gfange

dr esu vo kairo

nit nume d mönsche chöi ihri mitmönsche
nid aus das akzeptiere wo si sii
es git sogar lüt wie die imene zoo z kairo
won e esu aus zebra hei agmolet

wenigschtens het dä esu nit gmerkt
was mit ihm isch passiert
und het sich sicher witerhin aus esu gfüeut

mi hei vüu fründe und verwandti gwarnet
woni dr eric ha glehrt kenne
und mir gseit däm eric und sire familie
bisch du sicher zweni
die heis echlei höch im gring
sit si bouland hei verchouft
und millionäre sii

zerscht hets agfange drmit
dass i d brüsch hätti söue lo vergrössere
de hani vüu e z längi nase gha
aber woni mi abgmageret ha bis uf 45 kilo
und em immer no z dick bi gsi
hani einisch nach em mittag zämepackt
und bi wider hei go wohne

gott sei dank hani dä eric nit ghürote
das wär jo d höu gsi
mängs johr näbe eim müesse z läbe
wo eim nit cha akzeptiere wie me isch

d öutere si froh gsi
hani das experimänt vo mir us ufgä
und hei gmeint
wenn e nüie ma lehrsch kenne
söttisch de scho besser gschpüre
was dä für ne charakter het

gottlob bini nid eso ne esu gsi
und ha d brüsch und d nase lo operiere
ässe tueni ou wider wies mir passt

nume wüu dä eric zu vüu gäut isch cho
het dä doch nit s rächt gha
dass i nume no nach sine wünsch
hätti söue funktioniere
mir si do nit z kairo im zoo

schliesslich chani vier schproche
und fröie mi wider uf ene schtöu
wo mis läbe usfüut
und das mit mire z länge nase

d superchue bavona

ou d chüe si nid aui gliich
eini wie die bavona isch
dank ihrer ungloublische müuchleischtig
zumene schar worde
wo d medie über se hei brichtet

wo die bavona s erschte mou het kauberet
het dr buur gmerkt
dass är ganz e schpezielli chue
i sim schar het

die het immer gfrässe und gfrässe
und ou dank em guete erbguet
so vüu müuch gä wie kei chue vor ihre

ihre vatter isch
e bekannte kanadische muni gsi
und d mueter e gueti chue
bi däm buur wo d bavona isch gebore

d bavona het i sibeazähjohr
185 092 kilo müuch gä

so ne müuchleischtig het no nie
e chue i dr schwiz erreicht
si isch bi «swissherdbook»
die absoluti schpitzechue

leider het si jetze mit sibeazähni
müesse igschlöferet wärde

wüu si amene frömdkörper
im darm het glitte
si het äüä e aludose gschlückt
wo öpper uf d weid het gschosse

d frou het gseit die bavona hätts verdient
wenn si no chlei hätti dörfe läbe
und de einisch fridlich hätti chönne ischlofe

si het gmeint
dere bavona ischs gliich gange wie mire mueter
wo ou gäng für angeri isch do gsi
bis si einisch amene härzschlag isch gschorbe

d chüe vo 2020

aube hei d chüe mit ihrne glogge
zu üsne schöne landschafte ghört
und aui lüt hei fröid gha
wenn si das gloggeglüt hei ghört

jetze hei i vüune dörfer
nume no weni bure chüe
wüu d müuchwirtschaft
scho lang nümme räntiert

i de letschte hundert johr
hets i dr schwiz nie
so weni chüe gha wie jetz

drum hei d schwizer das johr
s fleisch vo 30 000 chüe
us em usland gässe

jetze mäude d medie
d usscheidige vo de chüe schadi dr natur

d böde und d wäuder versuufi i dr bschütti
üsi böde chönni so vüu bschütti
gar nid ufnäh

wägem dünger und dr bschütti
hets uf de fäuder ammoniak und nitrat
s nitrat geit is grundwasser
und macht s ökosischem kaputt
s ammoniak wäit dr luft uf d bluemematte